

四庫全書

史部

欽定四庫全書

史部

陸氏南唐書卷一至

四

詳校官監察御史_臣查瑩

侍讀_臣孫球覆勘

總校官庶吉士_臣倉聖脉

校對官中書_臣李荃

謄錄監生_臣馮士新

欽定四庫全書

史部九

南唐書目錄

載記類

卷一

烈祖本紀

卷二

元宗本紀

卷三

後主本紀

卷四

宋齊丘列傳

卷五

周徐查邊列傳

卷六

周柴何王張馬游刁列傳

卷七

徐高鍾常史沈三陳江毛列傳

卷八

三徐三王二朱胡申屠喬睦列傳

卷九

劉高盧陳李廖列傳

卷十

張李皇甫江歐列傳

卷十一

馮孫廖彭列傳

卷十二

孟陳韓朱列傳

卷十三

劉潘李嚴張龔列傳

卷十四

郭張林盧蒯二陳列傳

卷十五

周鄭李三劉江汪郭伍蕭李盧朱王魏列傳

卷十六

后妃諸王列傳

卷十七

雜藝方士節義列傳

卷十八

浮屠契丹高麗列傳

臣等謹案南唐書十八卷音釋一卷宋陸游撰游字務觀號放翁山陰人佃之孫宰之子

初以蔭補登仕郎隆興初賜進士出身嘉泰
初官至寶謨閣待制宋初撰錄南唐事者凡
六家大抵簡畧其後撰南唐書者三家胡恢
書久佚惟馬令書與游書盛傳而游書尤簡
核有法元天厯初金陵戚光訪得其書為之
音釋而博士程熟等校刊之趙世延為序錢
曾讀書敏求記稱舊本遵史漢體首行書某
紀某傳卷第幾而注南唐書於下今其本不

可見世所行者惟毛晉汲古閣本刻附渭南
集後者矣南唐元宗于周顯德五年即去帝
號稱江南國主胡恢從晉書之例題曰載記
不為無理游乃于烈祖元宗後主皆稱本紀
且于烈祖論中引蘇頌之言以史記秦莊襄
王項羽本紀為例深斥胡恢之非然劉知幾
史通本紀篇嘗謂姬自后稷至於西伯嬴自
伯翳至於莊襄爵乃諸侯而名隸本紀又稱

項羽僭盜而死未得成君假使明竊帝名正
可抑同羣盜况其名曰西楚號止霸王諸侯
而稱本紀循名責實再三乖謬則司馬遷之
失前人已深排之而游乃引以藉口謬矣得
非以南渡偏安事勢相近有所左袒於其間
乎他如后妃諸王傳置之羣臣之後雜藝方
士傳列于忠義之前揆以體例亦為未允觀
其書者取其敘述之簡嚴可也乾隆四十二

年十月恭校上

總纂官臣紀昀臣陸錫熊臣孫士毅

總校官臣陸費墀

南唐書原序

天曆改元余待罪中執法監察御史王主敬謂余曰公
向在南臺蓋嘗命郡士戚光纂輯金陵志始訪得南唐
書其於文獻遺闕大有所考證裨助良多且為之音釋
焉因屬博士程熟等就加校訂鋟板與諸史並行之越
明年余得告還金陵書適就光來請序按南唐本紀李
昇系出憲宗四世間闕困阨纔有江淮之地僅餘三十
年卒不復振而宋滅之雖為國褊小觀其文物當時諸

國莫與之並其賢才碩輔固不逮蜀漢武侯而張延翰
劉仁瞻潘佑韓熙載孫忌徐錯之徒文武才業忠節聲
華炳耀一時有不可揜矧其間政化得失興衰治亂之
跡有可為世鑒戒者尤不可泯也竊謂唐末契丹雄盛
虎視中原晉漢之君以臣子事之惟謹顧乃獨拳拳於
江淮小國聘使不絕嘗獻橐駝并羊馬千計高麗亦歲
貢方物意者久服唐之恩信尊唐餘風以唐為猶未亡
也邪宋承五季周統目為僭偽故其國亡而史錄散佚

不彰然則馬元康胡恢等迭有所述今復罕見至山陰
陸游著成此書最號有法傳者亦寡後世有能秉春秋
直筆究明綱目統緒之旨者或有所考而辯之姑識其
端以俟君子余前忝史館朝廷嘗議修宋遼金三史而
未暇他日太史氏復申前議必將有取於是書焉集賢
大學士奎章閣大學士光祿大夫知經筵事趙世延序

欽定四庫全書

南唐書卷一

宋 陸游 撰

烈祖本紀第一

烈祖光文肅武孝高皇帝名昇字正倫小字彭奴徐州人姓李氏唐憲宗第八子建王恪之元孫恪生超早卒超生志仕為徐州判司卒官因家焉志生榮榮性謹厚喜從浮屠遊多晦跡精舍時號李道者帝以光啓四年十二月二日生於彭城六歲而孤遇亂伯父球攜帝及

母劉氏避地淮泗至濠州乾寧二年淮南節度使楊行密見而奇之養以為子行密長子渥惡帝不以為兄弟行密乃以與大將徐溫曰是兒狀貌非常吾度渥終不能容故以乞汝遂冒姓徐氏名知誥帝事溫盡子道溫妻李氏以其同姓鞠養甚至及壯身長七尺方額隆準脩上短下語聲如鐘精采爍人常緩步而從者疾行莫能及溫有疾與其婦晨夜侍旁不去溫益愛之行密亦謂溫曰知誥雋傑諸將子皆不逮也天祐六年六月自元

從指揮使遷昇州防遏使兼樓船軍使治戰艦於昇七年五月授昇州副使知州事九年副柴再用平宣州以功遷昇州刺史時江淮初定守令皆武夫專事軍旅帝獨褒廩吏課農桑求遺書招延四方士大夫傾身下之雖以節儉自勵而輕財好施無所愛吝以宋齊丘王令謀王翽主論議曾禹張洽孫飭徐融為賓客馬仁裕周宗曹棕為親吏十一年加檢校司徒始城昇州十四年五月城成溫來觀喜其制度壯麗徙治焉而以帝為檢

授太保潤州團練使帝本意在宣州不悅時溫子知訓
以內外馬步都軍副使專制楊氏驕淫失衆宋齊丘納
說曰知訓旦暮且敗是行天所贊也十五年朱瑾殺知
訓馬仁裕自蒜山渡馳告帝帝即日帥師入廣陵定亂
遂代知訓為淮南節度行軍副使內外馬步都軍副使
勤儉寬簡盡反知訓之政上下悅服吳王建國以帝為
左僕射參政事國人謂之政事僕射棄剝亂之後曾未
期歲紀綱憲度粲然並舉溫雖遙執國政而人情頗已

歸屬于帝有徐玠者事溫為金陵行軍司馬工揣摩捭
闔密說溫曰居中輔政豈宜假之它姓請更用嫡子知
詢帝刺知皇恐表乞罷政事出鎮江西表未上而溫疾
亟遂止溫卒知詢嗣為金陵節度使諸道副都統數與
帝爭權帝乃使人誘之來朝留為左統軍悉奪其兵而
帝以太尉中書令出鎮金陵如溫故事吳命帝開大元
帥府置僚屬進封齊王用天子制度改名誥

昇元元年冬十月吳帝禪位乎我甲申即皇帝位改吳

天祚二年為昇元元年國號齊以十二月二日為仁壽
節尊吳帝為高尚思玄弘古讓皇帝上冊稱受禪老臣
誥追尊考溫為太祖武皇帝丙申以平章事張延翰為
右僕射兼門下侍郎同平章事門下侍郎張居詠中書
侍郎李建勲皆為同平章事以建康為西都廣陵為東
都改尚書省為尚書都省東都尚書省為留守院丙戌
改齊明門為朝元門丁亥封弟知證為江王知諤為饒
王戊子降吳太子璉為弘農郡公辛卯降吳建安王珙

江夏王璘等十一人爵一等而加官增戶邑詔獄訟未經本處論決者毋得詣闕訴乙未降吳公主為國君甲午立王后宋氏為皇后丙申封女弟杞國君為廣德長公主庚子遣使如漢閩吳越荆南告即位辛丑追封吳歷陽公濛為臨川王謚曰靈以禮改葬戊申封子景通為吳王諸道副元帥判六軍諸衛事十一月庚戌朔改東都舊第為崇德宮癸丑改承宣院為宣徽院丙辰追冊故妃魏國君楊氏為順妃丁巳追封長子景遷為高

平郡王長女為豐城公主改辭狀司為清訟院立姪景
邁為晉陵郡公景邁為上饒郡公景邈為桂陽郡公景
逸為平陽郡公封女五人為盛唐太和永興建昌玉山
公主戊午立子景遂為吉王景達為壽陽郡公以景遂
為東都留守江都尹赴東都已未陞東都海陵縣為泰
州割鹽城泰興如皋興化縣屬焉丁卯高從誨表請置
邸建康從之己巳吳越王使將軍袁韜來賀即位乙亥
追封故高平王景遷妃吳上饒公主為燕國君諡貞莊

十二月庚寅上太祖武皇帝陵曰定陵追尊高祖以下
皆為公王而稱宗配皆稱國君及妃墓皆稱陵惟武皇
帝之配李氏曰明德皇后丙午有星孛北方

昇元二年春正月己酉朔日有食之避殿停朝賀甲子
高從誨使龐守規來賀即位甲戌詔臣僚三品以上追
贈父母將相贈三世二月壬戌閩使內客省使朱文進
來賀即位夏五月讓皇屢請徙居南平王李德誠等亦
引漢隋故事以請戊午改潤州州治為丹陽宮以平章

事李建勲充迎奉讓皇使己未漢使集賢殿學士鄒禹
謨來賀即位甲寅徙讓皇居丹陽宮丁卯廣濟倉災焚
米二十萬石作渾天儀六月庚辰月入太微西華門犯
右執法辛巳犯東垣上相甲申陞池州為康化軍是月
高麗使正朝廣評侍郎柳勲律來朝貢秋七月壬申以
左丞相宋齊丘為平章事八月戊寅陞洪州瀟灘鎮為
清江縣不隸州丁亥契丹使摩哩尼嚕古來聘冬十月
丙子立太學命刪定禮樂癸未新羅使來朝貢壬辰命

吳王璟勒步騎八萬講武銅駝橋十二月辛丑讓皇殂
詔不視朝二十七日帝率百官素服舉哀是歲徙吳王
璟為齊王

昇元三年春正月庚戌江王知證饒王知諤表請帝復
姓李氏不許癸亥右丞相齊丘平章事居詠建勲樞密
使同平章事宗等表請復姓甲子御札詳議復姓乙丑
齊丘等議宜如所請從之丙寅至壬申齊王璟等三上
尊號曰應乾紹聖文武孝明皇帝不許詔曰迺者干戈

相尋地弗而不藝桑隕而弗蠶衣食日耗朕甚閔之民
有嚮風來歸者授之土田仍給復三歲二月乙亥改太
祖武皇帝廟號義祖己卯帝御興祥殿復姓為考妣發
哀與皇后皆服斬練居廬如始喪禮服考妣喪各二十
七日凡五十四日不視朝旦暮臨詔國事委宋齊丘惟
軍旅以聞羣臣固諫詔以墨練聽政帝初欲更名昂以
犯文宗諱乃名晃或云朱全忠名也又更名坦御史王
鵠言字從旦犯睿宗諱庚寅詔更名昇甲午月犯南斗

第六星乙未契丹使赫魯來以兄禮事帝蜀使來賀即位追尊高祖建王恪曰定宗孝靜皇帝貞妃程氏曰貞靜皇后曾祖超曰成宗孝平王配崔氏曰平貞妃祖志曰惠宗孝安王配盧氏曰安莊妃考榮曰慶宗孝德皇帝配劉氏曰德恭皇后庚午作南郊行宮千間夏四月庚辰朝享於太廟辛巳有事於南郊以高祖神堯皇帝配用上辛也大赦百官進位將士勞賜有差民三年藝桑及三千本者賜帛五十疋每丁墾田及八十畝者賜

錢二萬皆五年勿收租稅詔曰朕以眇躬託於民上常
懼弗類以羞高祖太宗之遺業羣公卿士顧欲舉上尊
號之禮朕甚不取其勿復以聞戊子進封李德誠趙王
徐知證韓王知諤梁王辛亥進封景遂壽王景達宣城
王丙寅以齊王璟為諸道兵馬大元帥丁未吳越王使
左武衛上將軍沈韜文荆南高從誨使王崇嗣來賀南
郊作北郊於玄武湖西熒惑犯月秋七月丙午放諸州
所獻珍禽奇獸于鍾山命有司作昇元格與吳令並行

甲寅歲星晝見自五月不雨至於閏七月冬十月丁丑
御後樓閱戰馬

昇元四年春二月詔罷營造力役毋妨農時三月丁未
頒中正厯厯官陳彖勛所譏也丙戌漢人閩人來聘夏
五月晉安州節度副使李金全來降六月癸亥罷宣州
歲貢木瓜雜果太師中書令趙王李德誠卒秋八月立
齊王璟為皇太子仍兼大元帥錄尚書事璟固讓從之
丁卯月掩歲星九月戊辰契丹使摩哩魯庫梅梭來聘

獻狐白裘冬十月癸巳朔日熒惑填歲星聚於南斗壬寅以齊王璟讓儲貳赦殊死以下京師賜酺內外諸軍給優賜禁表奏言聖睿二字違者以大不敬論乙巳詔幸東都命齊王璟監國庚戌帝自保德門御舟辛亥次迎鑾鎮甲寅至東都入建元門帝感念疇昔泣然流涕不已遣使問東畿士民不能自存者已未高麗使廣評侍郎柳兢質來貢方物十一月乙丑宴羣臣於崇德宮故第也以聽事為光慶殿庚辰改東都文明殿為乾元

殿英武殿為明光殿應乾殿為垂拱殿朝陽殿為福昌
殿積慶宮為崇道宮西都崇英殿為延英殿凝華內殿
前為昇元殿後為雍和殿興祥殿為昭德殿積慶殿為
穆清殿乙酉賜東畿高年疾苦憫獨米人二石漢使都
官郎中鄭翱闕使客省使葛裕吳越使刑部尚書楊嚴
來賀仁壽節十二月丙申帝至自東都

昇元五年春二月己未赦泰州刺史褚仁規五月戊辰
契丹使來秋七月詔曰右僕射兼中書侍郎同平章事

監修國史李建勲幸處台司且聯戚里靡循紀律敢黷
彝章其罷歸私第八月有星孛於天市長數尺七十日
沒遣使振貸黃州旱傷戶口是歲吳越水民就食境內
遣使振恤安集之

昇元六年春正月甲子月犯填星退行在畢閏月甲申
朔改天長制置使為建武軍庚寅漢使區延保來聘癸
巳閩使尚食使林弘嗣來聘都下大水秦淮溢東都火
焚數千家二月己丑以左丞相太保宋齊丘知尚書省

事初齊丘累求預政帝許中書視事又以兩省事多委給事舍人劇務多在尚書省又求知省事許之夏五月左丞相太保宋齊丘罷為鎮南軍節度使六月常宣歙三州大雨漲溢漢使蕭規來告哀廢朝三日庚午契丹使魯庫梅稜來聘獻馬五駒大蝗自淮北蔽空而至辛未命州縣捕蝗瘞之庚辰熒惑犯房次將辛巳禁節度刺史給攝署牒秋八月甲申漢使法物使公孫惠來謝襲位九月庚寅頒昇元刪定條冬十月詔曰前朝失御

四方崛起者衆武人用事德化壅而不宣朕甚悼焉三
事大夫其為朕舉用儒者罷去苛政與吾民更始十二
月開使徐弘績漢使滕紹英吳越使右武衛大將軍蔣
璠來賀仁壽節

昇元七年春正月契丹使達嚕噶等二十七人來聘獻
馬三百羊三萬五千二月庚午帝崩於昇元殿年五十
六十一月壬寅葬永陵帝臨崩謂齊王璟曰德昌宮儲
戎器金帛七百萬汝守成業宜善交鄰國以保社稷吾

服金石欲延年反以速死汝宜視以為戒帝生長兵間
知民厭亂在位七年兵不妄動境內賴以休息性節儉
常躡蒲履用鐵盆盥暑月寢殿施青葛帷左右宮婢裁
數人服飾樸陋建國始即金陵治所為宮惟加鴟尾設
闌檻而已終不改作元宗為太子欲得杉木作板障有
司以聞帝曰杉木固有之但欲作戰艦以竹代障可也
江淮間連年豐樂兵食盈溢羣臣多請恢拓境土帝歎
息曰吾少在軍旅見兵之為民害深矣誠不忍復言使

彼民安吾民亦安矣吳越國大火焚其宮室帑藏甲兵
幾盡將帥皆言棄其弊可以得志帝一切不聽遣使厚
持金幣唁之仁厚恭儉務在養民有古賢主之風焉

論曰昔馬元康胡恢皆嘗作南唐書自烈祖以下元康
謂之書恢謂之載紀蘇丞相頌得恢書而非之曰夫所
謂紀者蓋摘其事之綱要繫於歲月屬於時君秦莊襄
王而上與項羽皆未嘗有天下而史遷著於本紀范曄
漢書又有皇后紀以是質之言紀者不足以別正閏陳

壽三國志吳蜀不稱紀是又非可法者也蘇丞相之言
天下之公言也今取之自烈祖而下皆為紀而用史遷
法總謂之南唐紀云

南唐書卷一

欽定四庫全書

南唐書卷二

宋 陸游 撰

元宗本紀第二

元宗明道崇德文宣孝皇帝名璟字伯玉烈祖長子母
曰宋皇后初名景通風度高秀幼工屬文起家駕部郎
中累進諸衛大將軍烈祖為齊王立為王太子固讓昇
元初烈祖受禪封吳王徙齊王四年八月立為皇太子
復固讓曰前世以嫡庶不明故早建元良示之定分如

臣兄弟友愛尚何待此烈祖為下詔稱其守廉退之風
師忠貞之節有子如此予復何憂赦殊死以下臣民奉
牋齊王如太子禮七年二月烈祖病疽秘之人皆莫知
庚午疾亟太醫吳廷紹密遣人告帝帝馳入宮侍疾於
東閣是夕烈祖崩秘不發喪而下詔命帝監國大赦頒
賚有差丙子始宣遺詔

保大元年春三月己卯朔烈祖殂己旬日帝猶未嗣位
方泣讓諸弟奉化節度使周宗手取衮冕衣帝曰大行

付陛下神器之重豈得固守小節是日即皇帝位大赦
改元不待逾年遽改元識者非之百官進位二等將士
皆有賜蠲民逋負租稅賜鰥寡孤獨粟帛尊皇后為皇
太后立妃鍾氏為皇后以鎮南軍節度使宋齊丘為太
保兼中書令奉化軍節度使周宗為侍中徙封壽王景
遂為燕王宣城王景達為鄂王閩使來弔祭升濠州為
定遠軍秋七月徙燕王景遂為齊王鄂王景達為燕王
仍以景遂為諸道兵馬元帥居東宮景達為副元帥仍

詔中外以兄弟傳國之意八月乙卯立弟景遄為保寧王冬十月庚戌有星孛於東方嶺南妖賊張遇賢犯虔州詔遣洪州營屯都虞候嚴恩帥師討之以通事舍人邊錫監其軍其後擒遇賢及其黨黃伯雄曹景全斬於金陵市十二月以太保中書令宋齊丘為鎮海軍節度使

保大二年春正月侍中周宗罷為鎮南軍節度使左僕射兼門下侍郎平章事張居詠罷為鎮海軍節度使辛

已詔齊王景遂總庶政惟樞密副使魏岑查文徽得奏
事餘非召對不得見初烈祖尤愛景遂帝奉先志欲傳
以位故有是詔宋齊丘蕭儼皆上書切諫未見聽侍衛
都虞候賈崇叩閣請見曰臣事先帝三十年孜孜詢察
下情猶患壅隔陛下始即位所委何人而頓與臣下踈
絕如此因嗚咽流涕帝感悟命坐賜食遂收所下詔夏
五月閩將朱文進弒其君曦自稱閩王遣使來告帝囚
其使將討之議者謂閩亂由王延政當先討乃釋閩使

遣還秋九月庚午朔日有食之冬十二月樞密院使查
文徽請討王延政詔以文徽為江西安撫使往覘建州
文徽固請乃以邊錫為行營招討共攻延政敗績于蓋
竹

保大三年春二月以何敬洙為福建道行營招討祖全
思為應援使姚鳳為諸軍都監會查文徽進討秋七月
星見而風雨八月甲子朔日有食之克建州執王延政
歸於金陵拜羽林大將軍升建州為永安軍冬十月皇

太后宋氏殂是歲升建州延平津為劍州以建州之劍浦汀州之沙縣隸焉

保大四年春正月以青陽公宋齊丘為太傅兼中書令昭武軍節度使李建勲為右僕射兼門下侍郎及中書侍郎馮延巳皆平章事夏五月以樞密使陳覺為福建宣諭使使諭李宏義入朝不克覺擅發汀建撫信州兵趨福州帝遂命王崇文魏岑馮延魯會攻福州秋九月淮南蟲食稼除民田稅冬十月庚辰圍福州改漳州為

南州

保大五年春正月立齊王景遂為皇大弟徙燕王景達為齊王拜諸道兵馬元帥徙南昌王弘冀為燕王副元帥晉密州刺史皇甫暉棣州刺史王建來歸契丹耶律德光以滅晉來告捷且請會盟於境上帝不從遣工部郎中張易聘之請命使者如長安脩奉諸陵契丹亦不從三月己亥吳越救福州兵自海道至我師與之戰敗績諸營皆潰夏四月壬申詔即軍中斬陳覺馮延魯餘

將帥皆赦不問已而復詔械覺延魯還都既至貸死覺
流蘄州延魯流舒州五月帝聞契丹棄中原遁歸詔曰
乃眷中原我之故地以李金全為北面行營招討使六
月聞漢人汴兵遂不出而金全猶不罷秋閏七月丁丑
夜有彗出東方近濁其尾迹近側掃少微及長垣至八
月壬辰乃沒八月太傅兼中書令宋齊丘罷為鎮南軍
節度使

保大六年夏六月庚寅朔日有食之九月漢護國軍節

度使李守貞間道表求援師以鎮海軍節度使李金全為北面行營招討使救河中師次沂州冬十一月退保海州

保大七年春正月淮北盜起以神衛都虞候皇甫暉將軍張巒蕭處贇監軍散騎常侍張義方帥師萬人出海泗招降納亳州蒙城鎮將咸師朗等以歸夏六月癸酉朔日有食之冬十月我師度淮攻正陽敗績十二月泉州刺史劉從効兄南州刺史從願殺刺史董思安據南

州自稱刺史我不能問因升泉州為清源軍以從効為節度使

保大八年春正月李金全始罷北面行營招討使二月福州遣諜者詣建州留後查文徽告吳越戍卒亂殺李弘義棄城去文徽信其言襲福州大敗被執而別將建州刺史陳誨以戰懼敗福州兵執其將馬先進俘於金陵秋七月歸馬先進於吳越而求查文徽八月尚書郎周濬等三人奔漢九月楚朗州節度使馬希萼表請師

詔加同平章事賜以鄂州今年租稅命楚州團練使何敬洙帥師援之冬十月吳越歸查文徽十一月甲子朔日有食之十二月馬希萼攻陷潭州弒其君馬希廣楚將李彥溫劉彥瑫各以千人來歸

保大九年春二月楚王希萼使掌書記劉光翰來貢方物三月壬戌朔以右僕射孫晟客省使姚鳳為楚王策禮使又以洪州營屯都虞候邊錡為湖南安撫使便宜進封淮南饑夏五月辛未有星大如五升器自西南流

隆西北光燭地聲如雷六月楚靜江軍指揮使王達執
朗州節度使馬光惠歸於金陵推辰州刺史劉言為朗
州留後來請命秋九月楚將徐威等廢其君希萼命邊
錡出萍鄉以討楚亂冬十月壬寅武安留後馬希崇請
降錡入潭州癸丑武昌節度使劉仁贍帥舟師取岳州
湖南遂平南漢來攻陷郴州周兗州節度使慕容彥超
來乞援師從之

保大十年春正月陞洪州高安縣為筠州以清江萬載

上高三縣隸焉援兗州之師敗績於汴陽周人執我指揮使燕敬權二月周人歸敬權使來言曰吾賊臣背叛爾國助之豈長計哉且使潁州郭瓊遺我壽州劉彥貞書曰自古有國皆惡叛臣貴邦何為常事招誘吳中多士無乃淺圖帝頗愧其言以翰林學士江文蔚知禮部貢舉放進士王克貞等三人及第旋復停貢舉三月以太弟太保馮延巳為左僕射前鎮海節度使徐景運為中書侍郎及右僕射孫忌並同平章事帝以南漢乘楚

亂據桂宜等州將取之以知全州張巒兼桂州招討使
夏四月丙戌朔日有食之命統軍侯訓帥五千人會張
巒攻桂州敗績於城下訓死之巒收餘衆保全州周興
順指揮使白進福以族來歸秋九月召朗州劉言入朝
冬十月劉言將王逵周行逢攻潭州壬辰拔益陽寨戍
將李建期死之丙申潭州節度使邊鎬棄城遁辛丑劉
言將蒲公益攻岳州刺史宋德權監軍任鎬棄城遁十
一月劉言盡據故楚地詔流邊鎬於饒州斬宋德權任

鑄於太社斬裨將申洪泰尹建於都門外平章事馮延巳孫忌皆罷為左右僕射十二月雩都令趙暹奔周洪州大都督楚王馬希萼來朝留不遣是歲大旱

保大十一年春三月以左僕射馮延巳同平章事金陵火逾月焚官寺民廬數千間復設貢舉夏六月不雨井泉竭涸淮流可涉旱蝗民饑流入周境冬十月築楚州白水塘以溉屯田遂詔州縣陂塘湮廢者皆脩復之於是力役暴興楚州常州為甚帝使親吏車延規董其役

發洪饒吉筠州民牛以往吏緣為姦強奪民田為屯田
江淮騷然百姓以數丈竹去節焚香於中仰天訴冤者
不可勝數知制詔徐鉉因奏事白之帝曰吾國兵數十
萬安肯不食捍邊事有大利則舉國排之奈何鉉又力
陳其弊帝乃遣鉉行視利害鉉至楚州悉取所奪田還
民詰責車延規欲榜之百姓感悅而帝左右交譖以為
擅作威福帝大怒趣歸將沉之江中既至怒少解流舒
州而白水塘等役亦賴以止

保大十二年春正月有大星實於西北聲如雷二月命吏部侍郎朱軫知禮部貢舉自十一年六月至於今年三月大饑疫命州縣鬻粥食餓者秋七月契丹使其舅來聘夜宴清風驛盜斬契丹使亡去捕之不得或以為周人也自是契丹遂不至

保大十三年春二月以中書侍郎知尚書省嚴續為門下侍郎平章事夏六月周攻秦鳳蜀使閒使來告難周下詔罪狀我遣將李穀王彥超韓令坤等侵我淮南攻

自壽州帝乃以神武統軍劉彥貞為北面行營都部署
帥師三萬赴壽州奉化節度使同平章事皇甫暉為北
面行營應援使常州團練使姚鳳為應援都監帥師三
萬屯定遠縣召鎮南節度使宋齊丘入朝謀難冬十二
月以安定郡公從嘉為沿江巡撫使是歲天裂東北其
長二十丈

保大十四年春正月壬寅周帝親征劉彥貞與周師戰
於正陽敗績彥貞戰死二月周師兼道襲清流關皇甫

暉敗保淞州周師破城俘暉及姚鳳以歸壬戌有星孛于參芒東南指帝遣泗州牙將王承朗奉書至徐州求成於周稱唐皇帝奉書於大周皇帝願以兄事歲獻方物太弟景遂亦移書周將帥皆不報己卯遣翰林學士鍾謨文理院學士李德明使周奉表至下蔡行在貢金器千兩銀器五千兩錦綺紋帛二千疋及御衣犀帶茶藥又奉牛五百頭酒二千石攜軍請罷兵己酉周師陷東都執副留守馮延魯丁亥左神衛使徐象等十八人

自壽州奔周天長制置使耿謙以城降於周遣園苑使
尹廷範護遷讓皇之族於潤州廷範殺其男子六十人
誅廷範以謝國人周師陷秦州刺史方訥棄城遯帝遣
間使求援於契丹至淮北為周人所執吳越侵常州宣
州靜海制置使姚彥洪奔吳越三月遣司空孫晟及禮
部尚書王崇質使周削去帝號奉表請為外臣猶不許
光州兵馬都監張延翰以城降於周刺史張紹邈還丁
酉周師陷舒州刺史周弘祚赴水死蘄州將李福殺知

州王彖雋降於周戊戌天成軍使蔡暉自壽州奔周周師陷和州詔斬李德明於都市坐奉使請割地也吳越陷常州之郭執團練使趙仁澤燕王弘冀遣龍武都虞侯柴克宏救常州壬子大敗吳越兵於常州斬獲萬計俘其將數十至潤州弘冀悉斬之壬戌壽州軍校陳延貞等十三人奔周是月命諸道兵馬元帥齊王景達拒周夏四月復泰州五月周帝北還秋七月復東都舒斬光和滁州惟壽州之圍愈急冬十月周人害我行人孫

歲從者二百人皆死獨貸鍾謨以為耀州司馬是歲詔省淮南屯田之害民者

保大十五年春二月乙亥周帝親征齊王景達自濠州遣邊鎬許文稹朱元帥兵數萬援壽州景達用監軍使陳覺言謀奪朱元兵以楊守忠代之元遂舉寨降周裨將時厚卿獨不從見殺壬辰周師盡破我諸寨執邊鎬許文稹楊守忠餘衆悉奔潰景達亦遜歸金陵是役也所喪四萬人三月誅朱元妻子丁未壽州劉仁贍病革

副使孫羽等代仁贍署表降於周辛亥晝晦雨沙如霧
夏四月周帝北還冬十一月周帝復親征十二月濠州
刺史郭廷謂泗州刺史范再遇皆舉城降帝知東都必
不守遣使焚其官私廬舍徙其民於江南周師入揚州
丁丑周師攻陷泰州都城大火一日數發

交泰元年春正月改元中興丙戌周師陷海州壬辰周
師陷靜海軍丁未陷楚州防禦使張彥卿兵馬都監鄭
昭業死之周師屠其城焚廬舍殆盡周師次雄州刺史

易文贊舉城降州天長縣也三月大赦改元交泰以皇
太弟景遂為天策上將軍晉王立燕王弘冀為皇太子
參治朝政丁亥周帝次揚州辛卯遂至迎鑾鎮壬辰耀
兵江口帝懼周師南渡遣樞密使陳覺奉表貢方物請
傳位太子弘冀以國為附庸周帝始采唐報回紇可汗
故事答帝璽書稱皇帝致書敬問江南國主帝遣閤門
承旨劉承遇上表稱唐國主盡獻江北郡縣之未陷者
鄂州漢陽沔川二縣在江北亦獻焉歲輸土貢數十萬

乞海陵鹽監南屬不許後歲給贍軍鹽三十萬石庚子
周帝賜書許帝奉正朔罷兵而不許傳位太子甲辰遣
平章事馮延巳等使周犒軍及買宴夏五月下令去帝
號稱國主去交泰年號稱顯德五年置進奏邸於汴都
凡帝者儀制皆從貶損改名景以避周信祖諱告於太
廟告廟之日金陵大霧通夕不解左僕射平章事馮延
巳罷為太子太傅門下侍郎平章事嚴續罷為太子少
傅已酉周帝遣太府卿馮延魯衛尉少卿鍾謨賜國主

御衣金玉帶錦帛羊馬及攜軍帛十萬凡士卒俘於周者皆遣還凡五千七百五十人冬十月甲午周帝歸我臣馮延魯許文稹邊鎬周廷構國主皆不復用十一月己亥暴宋齊丘陳覺李徵古罪放齊丘歸九華山覺安置饒州徵古削官爵覺徵古尋皆賜自盡齊丘明年正月亦幽死

顯德六年秋七月鑄大錢文曰永通泉貨一當十與舊錢並行又鑄唐國通寶錢一當開通錢之二九月丙午

太子弘冀卒冬十一月建洪州為南都南昌府

建隆元年春正月遣何莅誅鍾謨於饒州誅張巒於宣
州大宋太祖皇帝受周禪放江南降將三十四人來歸
二月始鑄鐵錢三月遣使朝賀於京師秋七月遣禮部
郎中龔慎儀朝於京師貢祭輿服御自是貢獻尤數歲
費以萬計冬十月宋揚州節度使李重進叛來求援不
許十一月丁未太祖平李重進國主遣右僕射嚴續攜
軍蔣國公從鑑戶部侍郎馮延魯朝貢

建隆二年春二月國主遷於南都立吳王從嘉為太子
留金陵監國國主舟行旌麾仗衛六軍百司凡千餘里
不絕所過勞問高年疾苦大宴於當塗至宋家汭暴風
飄國主舟幾至北岸翼日從官皆棄輕舟奔問三月國
主至南都太祖以國主遷都遣通事舍人王守貞來勞
問南都迫隘羣下皆思歸國主亦悔遷北望金陵鬱鬱
不樂澄心堂承旨秦承裕常引屏風障之復議東遷未
及行國主寢疾不復進膳惟啜蔗漿嗅藕華六月己未

疾革親書遺令留葬西山累土數尺為墳且曰違吾言
非忠臣孝子夕有大星賁於南都庚申殂於長春殿年
四十六後主不忍從遺令迎喪還秋八月至金陵丁未
殯於宮中萬壽殿告哀於京師且請追復帝號太祖許
之

三年正月戊寅葬順陵元宗多才藝好讀書便騎善射
在位幾二十年慈仁恭儉禮賢睦族愛民字孤裕然有
人君之度少喜栖隱築館於廬山瀑布前蓋將終焉迫

於紹襲而止然自以唐室苗裔誅於斥大境土之說及福州湖南再喪師知攻取之難始議弭兵務農或曰願陛下十數年勿復用兵元宗曰兵可終身不用何十數年之有會周師大舉寄任多非其人折北不支至於蹙國降號憂悔而殂悲夫

論曰元宗舉閩楚之師境內虛耗及契丹滅晉中原有隙可乘而南唐兵力國用既已弗支孰視而不能出世以為恨予謂不然唐有江淮比同時割據諸國地大力

強人材衆多且據長江之險隱然大邦也若用得其人
棄閩楚昏亂一舉而平之然後東取吳越南下五嶺成
南北之勢中原雖欲睥睨豈易動哉不幸諸將失律貪
功輕舉大事弗成國勢遂弱非始謀之失所以行之者
非也且陳覺馮延魯輩用師閩楚猶喪敗若此若北鄉
而爭天下與秦晉趙魏之師戰於中原角一旦勝負其
禍可勝言哉故予具論其實如此後之覽者得以考觀
焉

南唐書卷二

欽定四庫全書

南唐書卷三

宋 陸游 撰

後主本紀第三

後主名煜字重光元宗第六子初名從嘉母曰光穆皇后鍾氏從嘉廣額豐頰駢齒一目重瞳子文獻太子惡其有奇表從嘉避旤惟覃思經籍歷封安定郡公鄭王
文獻太子卒徙吳王以尚書令知政事居東宮建隆二年遂立為太子元宗南巡太子留金陵監國以嚴續殷

崇義輔之張洎主牋奏六月元宗殂太子嗣立於金陵
更名煜居喪哀毀幾不勝赦境內尊鍾后曰聖尊后以
后父名太章也立妃周氏為國后徙信王景遷為江王
鄧王從善為韓王立弟從鎰為鄧王從謙為宜春王從
信為文陽郡公從度為昭平郡公從度景遷子也令諸
司四品至九品無職事者日二員待制於內殿以右僕
射嚴續為司空平章事餘進位有差遣中書侍郎馮延
魯於京師奉表陳襲位太祖賜詔答之自是始降詔秋

九月太祖遣鞍轡庫使梁義來弔祭冬十月太祖遣樞密承旨王文來賀襲位初元宗雖臣於周惟去帝號他猶用王者禮至是國主始易紫袍見使者使退如初服十二月置龍翔軍以教水戰

建隆三年春三月遣馮延魯入貢京師泉州節度使中書令晉江王劉從劾卒子紹鑑自稱留後四月泉州將陳洪進執紹鑑歸金陵推副使張漢思為留後六月遣客省使翟如璧入貢京師太祖故降卒千人南還冬十

一月遣水部郎中顧彝入貢京師

乾德元年春正月太祖遣使來賜羊馬橐駝三月太祖出師平荊湖國主遣使攜軍夏四月泉州副使陳洪進廢張漢思自稱權知軍府來告國主即以洪進為節度使秋七月太祖詔國主遣還顯德以來中朝將士在江南者及令揚州民遷江南者還其故土十二月國主表乞罷詔書不名之禮不從

乾德二年春三月行鐵錢每十錢以鐵錢六權銅錢四

而行其後銅錢遂廢民間止用鐵錢末年銅錢一直鐵錢十比國亡諸郡所積銅錢六十七萬緡命吏部侍郎脩國史韓熙載知貢舉放進士王崇古等九人國主命中書舍人徐鉉覆試舒雅等五人雅等不就國主乃自命詩賦題以中書官蒞其事五人皆見黜秋八月太祖於江北置折博務禁商旅過江九月立子仲寓為清源郡公仲宣宣城郡公十月甲辰仲寓卒國后周氏已寢疾哀傷增草遂亦卒十一月太祖遣作坊副使魏丕來

吊祭

乾德三年夏五月司空平章事嚴續罷為鎮海軍節度使秋九月雨沙聖尊后鍾氏殂冬十月太祖遣染院使李光圖來吊祭

乾德四年秋八月國主遣龔慎儀持書使南漢約與俱事中朝九月慎儀至番禺被執

乾德五年春命兩省侍郎諫議給事中中書舍人集賢勤政殿學士更直光政殿召對咨訪率至夜分

開寶元年春三月戊申以樞密使右僕射殷崇義為左
僕射同平章事境內旱太祖賜米麥十萬石冬十一月
立國后周氏

開寶二年三月以游簡言為左僕射兼門下侍郎同平
章事夏五月簡言卒是歲右僕射同平章事殷崇義罷
為潤州節度使同平章事

開寶三年夏太白晝見二日相觸

開寶四年冬十月國主聞太祖滅南漢屯兵於漢陽大

懼遣太尉中書令鄭王從善朝貢稱江南國主請罷詔書不名從之有商人來告中朝造戰艦數千艘在荆南請密往焚之國主懼不敢從

開寶五年春二月國主下令貶損儀制改詔為教中書門下省為左右內史府尚書省為司會府御史臺為司憲府翰林院為文館樞密院為光政院大理寺為詳刑院客省為延賓院官號亦從改易以避中朝初金陵殿闕皆設鳴吻元宗雖臣於周猶如故乾德後遇中朝使

至則去之使還復設至是遂去不復用降諸弟封王者
皆為公從善楚國從鎰江國從譙鄂國內史舍人張泌
知禮部貢舉放進士楊遂等三人清耀殿學士張洎言
必多遺才國主命洎考覆遺不中第者於是又放王倫
等五人閏月癸巳太祖命進奉使楚國公從善為泰寧
軍節度使留京師賜第汴陽坊示欲召國主入朝也國
主遣戶部尚書馮延魯謝從善爵命延魯至京師疾病
不能朝而歸

開寶六年夏太祖遣翰林院學士盧多遜來國主聞太祖欲興師上表願受爵命不許以司空殷崇義知左右內史事冬十月內史舍人潘佑上書切諫佑素與戶部侍郎李平交厚國主以為事皆由平始先以平屬吏遣使收佑佑自殺平縊死獄中皆徙其家外郡

甲戌歲秋國主上表求從善歸國不許太祖遣閤門使梁迥來使從容言曰天子今冬行柴燎之禮國主宜往助祭國主不答九月丁卯復遣知制誥李穆為國信使

持詔來曰朕將以仲冬有事園丘思與卿同閱犧牲且
諭以將出師宜早入朝之意國主辭以疾且曰臣事大
朝冀全宗祀不意如是今有死而已時太祖已遣潁州
團練使曹翰率師先出江陵宣徽南院使曹彬侍衛馬
軍都虞候李漢瓊賀州刺史田欽祚率舟師繼發及是
又命山南東道節度使潘美侍衛步軍都虞候劉遇東
上閣門使梁迥率師水陸並進與國信使李穆同行
冬十月國主遣江國公從鑑貢帛二十萬疋白金二十

萬斤又遣起居舍人潘慎修貢宴帛萬疋錢五百萬
築城聚糧大為守備閏十月王師拔池州國主於是下
令戒嚴去開寶紀年稱甲戌歲辛未王師進拔蕪湖及
雄遠軍吳越亦大舉兵犯常潤國主遺吳越王書曰今
日無我明日豈有君一旦明天子易地賞功王亦大梁
一布衣耳吳越王表其書於朝王師次采石磯作浮橋
成長驅渡江遂至金陵每歲大江春夏暴漲謂之黃花
水及王師至而水皆縮小國人異之國主以軍旅委皇

甫繼勲機事委陳喬張洎又以徐元瑀刁衍為內殿傳
詔而遽書警奏日夜狎至元瑀等輒屏不以聞王師屯
城南十里閉門守陴國主猶不知也初烈祖有國凡民
產二千以上出一卒號義軍分籍者又出一卒號生軍
新置產亦出一卒號新擬軍客戶有三丁者出一卒號
拔山軍元宗時許郡縣村社競渡每歲重午日官閱試
之勝者給綵帛銀稅皆藉姓名至是盡取為卒號凌波
軍民奴及贅壻號義勇軍募豪民以私財招聚亡賴亡

命號自在軍至是又大蒐境內自老弱外皆募為卒號
排門軍民間又有自相率拒敵以紙為甲農器為兵者
號白甲軍凡十三等皆使捍禦然實皆不可用奔潰相
踵

乙亥歲春二月壬戌王師拔金陵闕城三月丁巳吳越
攻我常州權知州事禹萬誠以城降誅神衛都指揮使
皇甫繼勳彗出五車色白長五尺夏六月轉見西方犯
太微六十日滅王師及吳越圍潤州留後劉澄以城降

吳越遂會王師圍金陵洪州節度使朱令贄帥勝兵十五萬赴難旌旗戰艦甚盛編木為棧長百餘丈大艦容千人令贄所乘艦尤大擁甲士建大將旗鼓將斷采石浮橋至皖口與王師遇傾火油焚北船適北風反焰自焚我軍大潰令贄及戰懼都虞候王暉皆被執外援既絕金陵益危蹙王師百道攻城晝夜不休城中米斗萬錢人病足弱者相枕藉國主兩遣徐鉉等厚貢方物求緩兵守祭祀皆不報冬十一月白虹貫日晝晦乙未

城陷將軍昌彥馬承信及弟承俊帥壯士數百力戰而死勤政殿學士鍾禧朝服坐於家亂兵至舉族就死不去光政使右內史侍郎陳喬請死不許自縊死國主帥司空知左右內史事殷崇義等肉袒降於軍門明年正月辛未至京師乙亥授右千牛衛上將軍封違命侯太宗即位加特進改封隴西公太平興國三年七月辛卯殂年四十二是日七夕也後主蓋以是日生贈太師追封吳王葬洛陽北邙山後主天資純孝事元宗盡子道

居喪哀毀杖而後起嗣位之初屬保太軍興之後國削
勢弱帑庾空竭專以愛民為急蠲賦息役以裕民力尊
事中原不憚卑屈境內賴以少安者十有五年憲司章
疏有繩糾過許皆寢不下論決死刑多從未減有司固
爭乃得少正猶垂泣而後許之常獵於青山還如大理
寺親錄繫囚多所原釋中書侍郎韓熙載奏獄訟有司
之事囹圄非車駕所宜臨幸請罰內庫錢三百萬以資
國用雖不聽亦不怒也殂問至江南父老有巷哭者然

酷好浮屠崇塔廟度僧尼不可勝算罷朝輒造佛屋易服膜拜以故頗廢政事又置澄心堂於內苑引能文士及徐元機元榆元樞兄弟居其間中旨由之而出中書密院乃同散地兵興之際降御札移易將帥大臣無知者皇甫繼勲誅死之後夜出萬人斫營招討使但署牒遣兵竟不知何往蓋皆澄心堂直承宣命也長圍既合內外隔絕城中之人惶怖無死所後主方幸淨居室聽沙門德明雲真義倫崇節講楞嚴圓覺經用鄱陽隱士

周惟簡為文館詩易侍講學士延入後苑講易否卦賜
惟簡金紫羣臣皆知國亡在旦暮而張洎猶謂北師已
老將自遁去後主益甘其言晏然自安命戶部員外郎
伍喬于圍城中放進士孫確等三十八人及第其所施
為大抵類此故雖仁愛足以感其遺民而卒不能保社
稷云

南唐書卷三

欽定四庫全書

南唐書卷四

宋 陸游 撰

宋齊丘列傳第一

宋齊丘字子嵩世為廬陵人父誠與鍾傳同起兵高駢表傳為洪州節度使以誠副之卒官因家洪州齊丘好學工屬文尤喜縱橫長短之說烈祖為昇州刺史齊丘因騎將姚克瞻得見暇日陪燕游賦詩以獻曰養花如養賢去草如去惡松竹無時衰蒲柳先秋落烈祖奇其

志待以國士從鎮京口入定朱瑾之難常參祕畫因說
烈祖講典禮明賞罰禮賢能寬征賦多見聽用烈祖為
禁小亭池中以橋度至則徹之獨與齊丘議事率至夜
分又為高堂不設屏障中置灰爐而不設火兩人終日
擁爐畫灰為字旋即平之人以比劉穆之之佐宋高祖
然齊丘資躁褊或議不合則拂衣徑起烈祖謝之乃已
義祖獨惡其為人每欲進拔輒不果浮沉下僚十餘年
義祖末年議者多請以徐氏諸子執國政烈祖聞之亟

欲自請出鎮齊丘請徐之俄而義祖殂自殿直軍判官
擢右司員外郎進右諫議大夫兵部侍郎居中用事且
倚以為相齊丘自以資望尚淺或不為國中所服乃告
歸洪州改葬因入九華山累啓求致仕不許時元宗已
為大將軍烈祖以吳主命命元宗躬往迎之於是齊丘
誼不得已而起遂拜中書侍郎遷右僕射平章事烈祖
出鎮金陵以元宗入輔委齊丘左右之初烈祖權位日
隆舉國皆知代謝之勢吳主謙恭無失德烈祖懼羣情

未協欲待嗣君與齊丘議合已而都押衙周宗揣微指請急至都以禪代事告齊丘齊丘默計大議本自己出今若遽行則功歸周宗欲因以釣名乃留與夜飲亟遣使手書切諫以為時事未可後數日馳至金陵請斬宗以謝國人烈祖亦悔將從之徐玠固爭纔黜宗為池州副使玠乃與李建勲等遂極言宜從天人之望復召宗還舊職齊丘由是頗見疎忌留為諸道都統判官加司空無所闕預從容而已數請退烈祖以南園給之俄而

齊國建猶以勲舊為左丞相而不預事李德誠周本自
廣陵持吳帝詔來行傳禪齊丘謂德誠子建勲曰尊公
吳室元勲今日掃地矣獨稱疾卧家不預勸進烈祖既
受禪徐玠為侍中李建勲為中書侍郎同平章事周宗
為樞密使齊丘但遷司徒中懷不平及宣制至布衣之
交忽抗聲曰臣為布衣時陛下亦一刺史耳今為天子
可不用老臣矣烈祖優容之嘗夜燕天泉閣李德誠曰
陛下應天順人惟宋齊丘不悅因出齊丘諷止勸進書

烈祖却之曰子嵩三十年故人豈負我者齊丘頓首謝
自是為求媚計更請降讓皇為公侯絕吳太子璉婚久
之表言備位丞相不當不聞國政又自陳為人所間烈
祖大怒齊丘歸第白衣待罪而烈祖怒已解謂左右曰
宋公有才特不識大體爾孤豈忘舊臣者命吳王璟持
手詔召見遂以丞相同平章事寔復委任兼知尚書省
事與張居詠李建勳更日入閣議政契丹耶律德光遣
使來齊丘陰謀間契丹使與晉人相攻則江淮益安密

請厚其原幣遣還至淮北潛令人刺殺之契丹與晉人
果成嫌陳齊丘親吏夏昌圖盜庫金數百萬特判傅輕
典烈祖命斬昌圖齊丘慚稱疾求罷省事許之遂不復
朝謁帝遣壽王景遂勞問許鎮故鄉始入朝因召與宴
飲齊丘酒酣輒曰陛下中興實老臣之力乃忘老臣可
乎烈祖怒曰太保始以游客干朕今為三公足矣齊丘
詞色愈厲曰臣為游客時陛下亦偏裨耳今不過殺老
臣遂引去烈祖頗悔明日手詔曰朕之性子蒿所知少

相親老相怨可乎拜鎮南節度使至鎮起大第窮極宏麗坊中居人皆使修飾垣屋民不堪其擾有逃去者初赴鎮烈祖曰衣錦晝行古人所貴賜以錦袍親為著之遂服錦袍視事元宗即位召拜太保中書令與周宗並相齊丘之客最親厚者陳覺元宗亦以為才馮延巳延魯魏岑查文徽與覺深相附結內主齊丘時人謂之五鬼相與造飛語傾周宗宗泣訴於元宗而岑覺又更相攻於是出齊丘為鎮海軍節度使齊丘怏怏力請歸九

華舊隱從之賜號九華先生封青陽公食青陽一縣租
稅元宗欲傳位齊王景遂詔景遂總庶政惟魏岑查文
徽得奏事餘非特召不得見國人大駭齊丘自九華上
疏極論不可會言者衆元宗乃收所下詔或謂齊丘先
帝勛舊不宜久棄山澤遣馮延巳召之不起遣燕王景
達再持詔往乃起拜太傅中書令封衛國公賜號國老
奉朝請然不得預政益輕財好客識與不識皆附之薦
陳覺使福州諭李弘義入朝覺至福州不敢言而專命

出兵敗事僉謂必生誅齊丘上表待罪置不問覺亦不
死齊丘方且怒韓熙載議其黨與黜之元宗不悅復使
鎮洪州周侵淮北起齊丘為太師領劍南東川節度使
進封楚國公與謀難齊丘固讓仍為太傅建議發諸州
兵屯淮泗擇偏裨可任者將之周人未能測虛實勢不
敢輕進及春水生轉饒道阻彼師老食匱自當北歸然
後遣使乞盟度可無大喪敗元宗惶惑不能用又力陳
割地無益與朝論頗異及明年暑雨周棄所得淮南地


北歸議者謂扼險要擊可以有功且懲後齊丘乃謂擊之怨益深不如縱其歸以為德由是周兵皆聚於正陽而壽州之圍遂不可解終失淮南方是時陳覺李徽古同為樞密副使皆齊丘之黨躁妄專肆無人臣禮自度事定必不為羣臣所容若齊丘專大柄則可以無患覺乃桑間言宋公造國於艱危如此陛下宜以國事一委宋公元宗意謀出齊丘大銜之會鍾謨使還挾周以為已重所言率見聽而謨本善李德明欲為報讐屢陳齊

丘樂國危殆竊懷非望且黨與衆謀不可測元宗遂命
殷崇義草詔曰惡莫甚於無君罪莫深於賣國放歸九
華山而不奪其官爵初命穴牆給食俄又絕之以餒卒
謚醜繆覺徵古皆誅死未幾元宗燕居見齊丘為厲叱
之不退遂遷南都後主立召其家還金陵廩給甚厚方
齊丘敗時年七十三且無子若謂窺伺謀篡竊則過也
特好權利尚詭譎造虛譽植朋黨矜功忌能飾詐護非
富貴滿溢猶不知懼狃於要君闇於知人釁隙遂成蒙

大惡以死悲夫

論曰世言江南精兵十萬而長江天塹可當十萬國老
宋齊丘機變如神可當十萬周世宗欲取江南故齊丘
以反間死方五代之際天下分裂大亂賢人君子皆自
引於深山大澤之間以不仕為得而馮道有重名於中
原齊丘擅衆譽於江表觀其人可以知其時之治亂矣
周師之犯淮南齊丘實預議論雖元宗不盡用然使展
盡其籌策亦非能決勝保境者且世宗豈畏齊丘機變

而間之者哉蓋鍾謨自周歸力排齊丘殺之故其黨附會為此說非其實也予論序齊丘事盡黜當時愛憎之論而錄其實覽者得詳焉



南唐書卷四

欽定四庫全書

史部

陸氏南唐書卷五至九

詳校官監察御史_臣查瑩

侍讀_臣孫球覆勘

總校官庶吉士_臣倉聖脉

校對官中書_臣李荃

謄錄監生_臣馮士新

欽定四庫全書

南唐書卷五

宋 陸游 撰

周徐查邊列傳第二

周宗字君太廣陵人少遇亂孤窮事烈祖為給使開於
擯相辭令方時艱難每使四方輒稱職端敏可仗恩顧
日治烈祖鎮金陵為都押衙時用宋齊丘議迎吳讓皇
都金陵繕府治為宮馬步都虞候蔡弘業為宮城營奉
使徙都統府於古臺城使都教練使孔昌祚營之都統

府成凡二千四百間環一千五百步烈祖已徙居且迎讓皇矣宗請問曰若主上西遷則公當東駕勞費方始怨嗟將日聞矣烈祖納之託以歲不利而止自是宗益預議論齊丘始忌之一日烈祖臨鏡理白鬚太息曰功業成而吾老矣奈何宗適侍側悟微指乃請如廣陵諷讓皇以禪代事亦請諭齊丘齊丘心忌大議自宗發及其將還留與飲酒而遣騎以手疏切諫烈祖得之大悔懼後數日齊丘馳至金陵為險語動烈祖請斬宗以謝

國人烈祖將從之徐玠固爭事乃已但黜宗為池州副使玠又與李建勲等言天人之望已集密定大計復召宗還舊職烈祖受禪宗躡進至內樞使同平章事遷侍中時以樞密為內樞者猶避吳武王諱也烈祖常召宗及宋齊丘馬仁裕宴於崇英院歡燕道舊為樂他將相莫預然待宗尤親厚不甚以職務嬰之宗亦能澹然畏遠權勢居家節儉俸賜皆積不用故齊丘黨雖日讒之不能害久之乃罷為江州節度使有俞文貞者早遊烈

祖幕府宗及馬仁裕皆趨走執事左右及宗出鎮文貞
仕宦蹭蹬猶為其州巡官方旅見輒越次問曰馬押衙
亡恙宗曰馬相公已鎮廬州文貞顧同列匿笑而退他
日預公設宗勸以酒文貞俛首曰下官小戶令公所熟
知也聞者大駭而宗怡然不動其寬厚如此徙宣州節
度使入覲賜燕元宗親為摺襖頭脚以表殊禮復出留
守東都請老以司徒致仕歸金陵馮延魯代為留守會
周師陷廣陵延魯自髡而逃見執於周人束縛桎梏僅

得免死時人益以宗享福終始為異俄而宗病卒年七十餘宋齊丘時以太傅奉朝請撫其棺哭曰君大黜來亦得時去亦得時元宗聞之不平宗二女皆為後主后徐鉉字楚金會稽人父延休字德文風度淹雅故唐乾符中進士昭宗狩石門無學士草詔延休來調官適在旁近逆旅左右言其工文詞即召見命視草昭宗善之及還長安不得用梁蔣玄暉辟為其佐延休棄去依鍾傳於洪州吳取江西得延休仕至光祿卿江都少尹卒

二子鉉錯遂家廣陵錯四歲而孤母方教鉉就學未暇及錯錯自能知書稍長文詞與鉉齊名昇元中議者以文人浮薄多用經義法律取士錯恥之杜門不求仕進鉉與常夢錫同直門下省出錯文示之夢錫賞愛不已薦於烈祖未及用而烈祖殂元宗嗣位起家祕書郎齊王景達奏授記室時殷崇義為學士草軍書用事謬誤錯竊議之崇義方得君誣奏錯泄禁省語貶烏江尉歲餘召還授右拾遺集賢殿直學士論馮延魯有罪無才

人望至淺不當為巡撫使重忤權要以祕書郎分司東都然元宗愛其才復召為虞部員外郎後主立遷屯田郎中知制誥集賢殿學士改官名拜右內史舍人賜金紫宿直光政殿兼吏兵部選事與兄鉉俱在近侍號二徐初錯久次當遷中書舍人游簡言當國每抑之錯乃詣簡言簡言從容曰以君才地何止一中書舍人然伯仲並居清要亦物忌太盛不若少遜之錯頗快快簡言徐出妓佐酒所歌詞皆錯所為錯大喜乃起謝曰丞相

所言乃錯意也歸以告鉉鉉歎息曰汝癡絕乃為數閔歌換中書舍人乎錯凡四知貢舉號得人後主哀所製文命為之序士以為榮錯酷嗜讀書隆寒烈暑未嘗少輟後主嘗得周載齊職儀江東初無此書人無知者以訪錯一一條對無所遺忘其博記如此既久處集賢朱黃不去手非莫不出少精小學故所警書尤審諦每指其家語人曰吾惟寓宿於此耳江南藏書之盛為天下冠錯力居多後主嘗歎曰羣臣勤其官皆如徐錯在集

賢吾何憂哉李穆來使見錯及鉉歎曰二陸之流也嘗
夜直召對論天下事因及用人才行孰先後主曰多難
當先才錯曰有人才如韓彭而無行陛下敢以兵十萬
付之乎後主稱善時國勢日削錯憂憤鬱鬱得疾謂家
人曰吾今乃免為俘虜矣開寶七年七月卒年五十五
贈禮部侍郎謚曰文著說文通釋方輿記古今國典賦
苑歲時廣記及他文章凡數百卷錯卒逾年江南見討
比國破其遺文多散逸者

查文徽歙州休寧人幼好學能自刻苦手寫經史數百
卷稍長任氣好俠聞人困乏雖不識必濟之家本富坐
是窮空不悔也或遺以金帛一夕盜入其家盡取去文
徽不言雖鄰里莫知者久之盜敗於旁邑移文訊驗人
始知之咸推其量烈祖輔政初入謁烈祖召與語偉其
論宋齊丘亦稱薦之徐知諤領浙西以文徽為其判官
或獻玉盃知諤喜酌以錢百萬趣開宴出盃行酒至文
徽偶墮地碎一坐皆驚而文徽自若烈祖受禪人為監

察御史元宗立進諫議大夫中書舍人樞密副使閩主
延義與其兄延政相攻延政以建州建國稱殷而延義
為其下所殺推立大將朱文進元宗欲討文進文徽以
為延政首亂當先致討有翰林待詔臧循者與文徽同
里巷少嘗為賈入閩習知其山川險易為陳進兵之策
文徽本好言兵遂請行元宗乃以為江西安撫使令至
境上審觀可否文徽銳於成功至上饒復命盛言必克
詔發洪州屯兵以邊鎬為將從文徽攻建州建人厭王

氏之亂伐木開道迎我師行次蓋竹遇建州兵至又聞
泉漳汀州皆歸延政恐懼退保建陽時臧循亦為別將
屯邵武延政襲破之獲循斬於建州軍聲大烈元宗遣
何敬洙等來援敬洙鎬與建州兵相持文徽得建之降
將孟堅使潛師出其後擊之建州兵大敗潰去遂傳其
城雖下建州諸軍無紀律殺掠不禁民始失望有叛志
矣元宗知而置不問策功遷撫州觀察使又拜建州留
後由是文徽益自用時李弘義挾吳越兵據福州偽遣

謀來告福州亂文徽喜率劍州刺史陳誨赴之誨將舟師至福州城下擊敗其兵執吳越將馬先進等三人文徽以步騎繼至弘義陽遣卒數百人出迎而設伏西門以待文徽傳令徑入其城陷伏中大敗隆馬被執送錢塘將士死者萬人元宗遣使歸馬先進于吳越而求文徽吳越王遣還將發為置酒寘毒歸至金陵毒始作元宗使醫視之醫以珠置口中有頃珠色變黑醫曰疾不可為然猶十年乃死文徽遂病瘖以工部尚書致仕朱

元降周坐親黨安置宣州卒年七十距遇毒之歲正十年云謚曰宣子元方元規元素元範元賞元方事後主為水部員外郎吉王從謙掌書記從謙朝京師太祖命知制誥盧多遜燕從謙於館多遜奕棋次顧元方曰江南竟何如元方歛衽曰江南事大朝十餘年極君臣之禮不知其他多遜推枰愧謝曰勿謂江南無人使還通判建州盧絳據宣州傳檄至建元方立斬其使及絳平太祖聞元方所為大悅擢殿中侍御史知泉州卒官元

方子道龍圖閣待制始徙家海陵純厚長者以文行稱於時道從兄陶及事後主國亡入朝仕至祕書少監知審刑院與道尤極友愛自金陵破士族流離多貧困失職惟道兄弟盡力收恤聚食常數十百人得任子恩皆以與族人以少長為先後無親疎之間異姓亦分俸給之時其婚姻由是常苦貧而查氏至今為海陵望族許國篇皆其後也邊錫金陵人少事烈祖為通事舍人以通敏稱保大初循州人張遇賢本羅縣小吏有神降於縣之刻杉鎮語

人曰張遇賢非常人當事我遇賢往事之會州境羣盜起各擁衆數百無所統相與禱於神神又大言曰張遇賢汝主也遇賢遂稱王改元置百官度嶺襲虔州節度使賈浩閉門登陴不敢出遇賢據白雲洞衆十餘萬元宗遣洪州營屯都虞候嚴思率所部討之鎬為監軍虔有書生白昌裕沉密有謀鎬引與定計刊木開道襲白雲洞會遇賢所事神棄去不復降語賊衆遂潰其裨將李台執之以降策功遷洪州營屯諸軍

都虞候二年查文徽以樞密副使出師伐建州詔鎬為
行營招討洪撫饒信歙等州諸指揮都虞候從文徽行
然衆纔數千戰敗退舍元宗聞之遣何敬洙祖全恩姚
鳳來援敬洙與鎬進兵奪其險要自崇安進次赤嶺與
建兵方相持為背水陣文徽使騎繚出建兵之後與敬
洙鎬夾擊大破之遂取建州降王延政復取漳州事平
諸將皆爭功鎬獨無一言七年楚馬氏兄弟相攻希萼
雖勝而尤無道元宗知楚難方殷以鎬為信州刺史領

屯營兵兼湖南安撫使駐袁州萍鄉有警許便宜從事
楚人果復廢立錡自萍鄉帥師入潭州遷馬氏之族及
文武將吏于金陵遂拜潭州節度使南漢將潘崇徹攻
郴州錡出兵爭之敗績遂失郴州錡懼南漢寇邊未已
請除道全二州刺史詔以廖偃為道州刺史張巒權知
全州然湖湘之憂實不在南漢也自馬氏廢立以來帑
藏空竭土地既歸我馮延巳為相矜平楚之功不欲取
費於國專招歛楚人以給經費人心已離錡柔而無斷

日飯沙門希福紀綱類弛不之問初成師朗來歸以其
所部為奉節軍從鎬入楚廩給薄于楚之降卒偶語怨
望而糧料使王紹顏每給奉節糧輒刻削之軍校孫朗
欲殺紹顏紹顏匿困下得免官屬請斬紹顏以謝將士
鎬不聽朗乃謀殺鎬及紹顏據湖南歸中原夜率所部
取草燒府門火輒不發良久傳漏者覺之以告鎬出衙
兵與鬪勝負未決鎬命吹角亂兵少以為將旦亟斬關
奔朗州盡以潭州虛實告劉言言久懷叛志得朗言大

喜遣其將王進遠周行逢來攻鎬亦備言已而聞人謂忠順傾意信之及言兵已拔益陽遂夜棄城出奔列城皆潰盡喪楚地坐削官流饒州而他將棄城者皆斬湘中謠言馬去不用鞭至是而驗十四年周師大入齊王景達為元帥出兵援壽州起鎬為大將戰敗被執世宗命為右千牛衛上將軍及元宗割淮南地請盟世宗乃歸鎬卒于金陵

南唐書卷五